

22/09/1998

Tindakan gugat keamanan

KUALA LUMPUR, Isnin - Parti Gerakan menyifatkan tindakan Datuk Seri Anwar Ibrahim melancarkan gerakan reformasi dengan mengetepikan undang-undang sebagai tidak demokratik.

Presidennya, Datuk Seri Dr Lim Kheng Yaik, berkata Anwar secara terang melanggar undang-undang dengan mengadakan perhimpunan tanpa permit serta menghasut rakyat.

Sambil menyifatkan Anwar sebagai `tidak rasional', Dr Lim berkata, tindakan itu tidak saja mengancam kestabilan politik, malah menyukarkan lagi kerajaan memulihkan ekonomi negara.

Sehubungan itu, pengikut Anwar perlu bersabar dan tidak menimbulkan kekacauan.

"Kita memerlukan kestabilan politik bagi memulihkan ekonomi. Anwar yang pernah menganggotai Kabinet dan pengikutnya perlu memahami keadaan ini.

"Mengadakan demonstrasi tidak boleh menyelesaikan masalah, sebaliknya menimbulkan keadaan huru-hara," katanya pada sidang akhbar di sini, hari ini.

Dr Lim yang juga Menteri Perusahaan Utama, berkata Gerakan menyokong penuh tindakan polis menahan Anwar bagi mengawal ketenteraman awam.

"Kami juga memohon pengikut Anwar supaya mematuhi undang-undang dan membiar Anwar menyelesaikan masalahnya di mahkamah," katanya.

Beliau mengulangi sokongan Gerakan berhubung keputusan Perdana Menteri, Datuk Seri Dr Mahathir Mohamad, memecat Anwar.

"Kami juga meminta parti pembangkang tidak mengambil kesempatan dengan membakar semangat orang ramai," katanya.

(END)